

Noticia  
Transparente  
di Gobierno

# ISLA ONLINE

Diamars 30 April 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952



**STABILIDAD  
Y  
PROSPERIDAD**

2 0 2 4

**Gabinete Wever-Croes**





## PROME MINISTER PRESENTE NA E CELEBRACION NACIONAL DI DIA INTERNACIONAL DI BAILE

**Riba e dia aki rond di mundo ta rindi homenahe na e bunitesa y diversidad di e arte di baile**



Dialuna anochi den Cas di Cultura a celebra e Dia Internacional di Baile. Prome Minister Evelyn Wever-Croes den representacion di Minister di Finansa y Cultura, señora Xiomara Maduro, a duna un discurso dedica na e arte bunita aki.

Tur aña dia 29 di april, ta celebra Dia Internacional di Baile. Esaki ta un iniciativa di Comite Internacional di Danza, cu a wordo proclama pa UNESCO for di aña 1982. E fecha aki a wordo scogi pa conmemora e fecha natal di e bailarin y coreografo Frances, Jean-Georges Noverre, cu ta wordo considera e creador di ballet moderno. Esaki ta un dia di celebracion rond mundo durante unda ta rindi homenahe na e bunitesa y diversidad di e arte di baile.

Prome Minister a expresa cu e arte di baile no tin barera cultural ni politico tampoco tin genero, rasa of religion. Baile tin un

impacto grandi riba nos bida y tambe tin un papel importante den nos cultura entre otro durante nos carnaval y celebracionnan nacional. Baile ta un medio pa expresa e idioma di nos alma, e ta uni cultura, conectando nos por medio di un idioma comparti di pasion y expresion. A traves di baile tambe nos ta expresa sentimento di alegria y ta promove salud mental. Tambe e ta un manera pa haci ehercicio y ta baha stress.

Prome Minister den nomber di Gobierno di Aruba ta felicita tur bailado, scol di baile, grupo di baile, director, coreografo, docente y maestro di baile. “Masha danki pa boso cooperacion pa entretene nos comunidad y engradece cultura di Aruba cu boso inspiracion, creatividad y talento. Un danki tambe na Departamento di Cultura y na tur cu a yuda organisa e anochi bunita aki”, e mandatario a expresa.







# Prome Minister Evelyn Wever-Croes: Den conexion cu e firmamento di e acuerdo pa indexering 2018-2023

## LIDERNAN SINDICAL TA SATISFECHO CU E ACUERDO FIRMA



Dialuna merdia, durante conferencia di prensa di Gobierno di Aruba, lider sindical di SADA, señor Edward Maduro a compaña Prome Minister Evelyn Wever-Croes pa asina duna empleadonan publico y "gelijkgestelden" e grato noticia cu Gobierno di Aruba y miembronan sindical a firma e acuerdo pa loke ta e tema di indexering pa aña 2018 pa 2023.

Señor Maduro a indica cu desde Januari caba Gobierno y sindicatonan tabata den negociacion y reunionnan intenso pa cu e tema aki, mirando cu na 2019 a cuminsa papia riba e inflacion di 2018. Desafortunadamente e negociacionnan aki a tranca na final di 2019, y a bay riba un "hold" na momento cu pandemia a dal.

E tabata un tempo largo prome cu a inicia e negociacionnan aki bek, pero mirando e necesidad di empleadonan publico pa logra un ahustacion riba nan salario, sindicatonan a uni y a aserca Prome Minister pa haya su atencion pa cu e tema aki. Despues di negociacion y reunionnan intenso a logra yega na un acuerdo den beneficio di empleadonan publico y "gelijkgestelden". Cada sindicato a acerca nan "achterbaan" na nan manera, pero e resultado final ta den liña cu locual e empleadonan publico tabata kier a wak, cu ta un compensacion pa e perdida di forsa di compra.

Señor Maduro a splica cu nan como sindicato ta consciente cu costo di bida ta halto, debi na inflacion y cu esaki a afecta tur trahado. P'esey ahustacion di salario tabata necesario pa asina tur hende por sigui contribui na e economia di pais Aruba. Como lider sindical, nan a wak e necesidad di nan miembronan y mirando cu nan ta e orea y voz di cada un di e empleadonan, tabata nan deber di yega cerca nan doño di trabou pa purba na yega na un solucion.



Apesar cu Gobierno tin e rol di goberna un pais, e tin e rol tambe di dunado di trabou. Aki ta unda lidernan sindical a acerca Prome Minister cu na su turno a duna nan oido, y sinta negocia na un manera profesional y cu respet pa purba yega na un solucion. E acuerdo aki ta uno historico, y empleadonan por confia cu nan directiva a haci un trabou profesional sin cu mester a yega na e punto drastico di bay den accion. No ta tur biaha tur hende lo keda contento cu e resultado, pero lidernan sindical ta satisfecho cu e logro aki pa nan miembronan.

Señor Maduro, den nomber di sindicatonan ta felicita tur empleado publico y "gelijkgestelden" cu e gran logro aki. Tambe ta gradici Prome Minister pa duna nan e oido pa por a yega na e acuerdo aki, y señor Orlando Senchi cu semper tabata disponibel pa yuda na momento cu lidernan sindical tabata tin mester cualkier informacion. Por ultimo tambe ta duna danki na Consejo di Minister, y tur e profesionalnan cu tabata presente durante e reunionnan. "Nos ta contento cu awe nos ta sinta cu 6 aña tras di lomba cu a wordo ahusta, y awor lo percura pa sigui traha riba e tema aki pa no tin un atraso mas di tanto aña dado caso tin inflacion", señor Maduro a expresa. ■



Prome Minister Evelyn Wever-Croes:

PROME MINISTER SU MENSAHE PA DIA DI OBRERO

Danki di curason pa e esfuerso y e labor cu boso ta haci pa nos dushi isla Aruba



E aspecto mas importante pa un doño di trabou por logra su vision y metanan ta su trahadonan.

Dia 1 di mei, Dia di Obrero, Prome Minister den nomber di Gobierno di Aruba ta gradici cada trahado pa nan esfuerso, dedicacion, y nan empeño. Prome Minister a expresa cu danki na e forsa di cada un trahado, por bati riba pecho cu orguyo y bisa cu Aruba ta den recuperacion di e peor pandemia y Aruba ta prosperando.

“Mi ta gradici tur esanan cu danki na nan labor ta yuda nos pais bay padilanti. Abo cu ta traha duro tur dia, lanta mainta trempan, lora bo manga y bay traha y asina hiba bo empresa of bo organisacion padilanti y asina hiba Aruba padilanti tambe. Awe nos kier para keto pa nos reconoce bo.

Mi sa cu no ta facil, e por ta bin cu hopi sacrificio y lucha y nos kier pa bo sa cu nos ta reconoce esaki. Cu Dios sigui bendiciona tur esnan cu ta labora na Aruba pa asina hunto nos sigui hiba e pais aki padilanti. Pabien riba Dia di Obrero y danki di curason pa e esfuerso y e labor cu boso ta haci pa nos dushi isla Aruba,”Prome Minister a expresa.







## PROGRESO DI EMBEYECIMIENTO DI E EAGLE BEACH STRIP FASE 4 & 5 AVANSANDO



Tawata na 2023 cu Minister Dangui Oduber a anuncia e proyecto di “beautification of Eagle Beach”, cual awendia ta den su fase final. E proyecto aki ta di embeyece henter e strip di Eagle Beach den cuadro di e mehoracion di nos producto Aruba y lo percursa pa uniforma e paisahe cu flornan y piedranan blanco, pone mas bari di sushi pa henter e strip. Asina lo logra pa e strip por keda mas organisa y miho structura, tambe pa tin un miho manejo di desperdicio den e area aki. En total lo ta un experiencia mas agradabel pa nos bishitantenan y nos localnan.

Eagle Beach su strip ta wordo embeyece di retonde di Amsterdam Manor te cu e retonde di Alhambra. Actualmente ta den e fase 4 y 5 cual ta e ultimo parti banda di Costa Linda.

Un colaboracion entre Tourism Product Enhancement Fund (TPEF), Aruba Tourism Authority (ATA), DOW y conhuntamente cu tur e general managers di e priopiedadnan hotelero cu a percursa pa hunto, nan compromete pa haci mantencionan necesario den futuro. Minister ta kere den public-private partnership, unda nos tur ta traha hunto pa eleva e producto Aruba.

Finalmente Minister Dangui Oduber ta sumamente contento cu e colaboracion y cooperacion di tur “partners” cu ta haciendo e



proyecto aki bira un realidad y pa sigui eleva e producto Aruba. E proyecto ta avansando y manera cu esaki ta cla lo mira un cambio den e area aki pa uno mas bunita y mihor organisa.



# FELIZ DIA DI OBRERO

I MEI 2024

UN DANKI NA TUR TRAHADO PA SIGUI CU E GRAN APORTE NA NOS  
COMUNIDAD MUY EN ESPECIAL ESNAN CU TA LABORA DEN NOS SECTOR  
TURISTICO Y ESNAN CU TA TRAHA DEN SALUBRIDAD. LAGA NOS HONRA  
NAN TRABOUNAN, DEDICACION, Y CONTRIBUCION.  
SA CU BOSO APORTE TA WORDO APRECIA PROFUNDAMENTE.

**FELIZ DIA DI OBRERO!**




MINISTERIO DI TURISMO Y SALUBRIDAD PUBLICO

Minister di Turismo y Salud Publico  
Dangui Oduber



30 di april 2024

# Feliz Dia di Rincon

35 AÑA Dia di  
**RINCON**

**Felicitacion** pa e comunidad Boneriano  
cu **35 aña** di Dia di Rincon.  
**Un brasa cultural di Aruba pa Boneiro.**



Minister di Finansa y Cultura

*Xiomara Maduro*

**Minister** di Finansa y Cultura

@MinisterXiomaraMaduro







## MINISTER GEOFFREY WEVER A PRESENTA ESFUERSONAN PA STIMULA AGRICULTURA COMERCIAL NA PARLAMENTO

Siman a habri cu un presentacion na Parlamento di Aruba encuanto esfuersonan andando pa stimula e desaroyo di agricultura comercial na Aruba como un pilar economico nobo. Minister di Asuntonan Economico, Comunicacion y Desaroyo Sostenibel, Geoffrey Wever, a elabora riba diferente proyecto cu enfoca riba desaroya agricultura comercial, e retonan y con ta trahando pro-activamente pa resolve "bottlenecks" cu ta den alcance di su Ministerio di Asuntonan Economico.



Reconociendo e desafionan cu agricultornan local ta enfrentando — costo halto di awa y coriente, disponibilidad di tereno, conocimiento tecnico y empresarial, y acceso limita na financiamiento pa proyectonan agricola — Minister Wever a detaya e pasonan concreto cu su ministerio a tuma pa mitiga e obstaculonnan aki y fomenta crecemento di e sector, hunto cu e pasonan cu Minister Arends, como minister di sector primaria ta implementando.

Destacando e iniciativanan strategico di e ministerio, Minister Wever a introduci Agri-Business Academy y Agri-Fund, den colaboracion cu Minister Arends y instancia financiero di credito, Qredits Aruba.

Agri-Business Academy: Ta un proyecto cu ta dirigi pa aumenta e habilidadnan empresarial di agricultornan, e academia aki a ser introduci na comienso di 2023, y ta provee entrenamiento esencial y apoyo pa asegura cu agricultornan di Aruba ta ekipa pa maneja y crece nan negoshi agricola efectivamente. E aña aki lo organisa e Agri-Business Academy un bes mas pa sigui cu e esfuersonan.

Agri-Fund: E programa di financiamiento aki ta ofrece financiamiento cu interes abou (na 2% di interes) pa apoya desaroyo y expansion di proyectonan agricola, y haci'e mas facil pa agricultornan obtene e capital necesario pa inverti den nan negoshi pa asina por aumenta productividad y promove nan sustentabilidad comercial.

Minister Wever a expresa optimismo tocante e potencial di e programanan aki pa inicia desaroyo amplio den e sector di agricultura comercial. "Si nos por demostra cu e modelo di Agri-Business Academy y Agri-Fund ta exitoso, nos lo regresa Parlamento den futuro cercano pa solicita fondo adicional pa sigui stimula e industria ariba un escala mas amplio," minister Wever a declara.

E Ministerio tin plan pa anuncia mas proyectonan pronto cu lo sigui fortalece e sector vital aki. "Nos ta compromete na transforma e panorama agricola di Aruba, asegurando 'food security', y fomentando diversificacion economico," Minister Wever a conclui. ■



# MINISTER GEOFFREY WEVER A PRESENTA PLAN DI MEHORACION PA FUNCIONAMENTO DI HUURCOMMISSIE NA PARLAMENTO



Minister di Asuntonan Economico, Comunicacion y Desaroyo Sostenibel, Geoffrey Wever, a presenta awe na Parlamento di Aruba un plan integral pa mehora e funcionamiento di e Huurcommissie, cu ta encarga cu e regulacion di asuntonan relaciona cu huur di propiedad.

Minister Wever a reconoce e necesidad di personanan nobo den e comision, introduciendo a Sra. Monica Kock como Presidente y Sra. Marlee Lacle como Secretaris. Tambe a elabora riba un "Processreglement" nobo cu ta ser introduci, acompaña pa un cambio di localidad y un diseño nobo pa facilita reunionnan entre huurder y verhuurder na un manera mas efectivo. Tambe tabata importante pa ahusta e bezoldeging di e personanan den e Huurcommissie, mirando e cantidad trabou y e responsabilidad y experticio necesario pa eherce e trabou, pa cual ta dificil pa haya personanan capacita pa eherce esaki.

E Huurcommissie ta opera manera un "corte", basa riba leynan pertinente. E no ta interacciona directamente cu clientenan ni ta duna conseho, pero ta enfoca solamente riba soluciona conflictonan entre huurder y verhuurder.

SEDECO (Dienst Huur en Consumenten Zaken) tin un rol

crucial den proteccion di derecho di consumidor y huurders. Ademá, Minister Wever a splica cu AFTA (Aruba Fair Trade Authority) pronto lo bai wordo encarga cu proteccion di consumidor contra violacionnan sistematico di entidadnan, a traves di un ley nobo cu tin den preparacion.

E presentacion di Minister Wever ta marca un paso importante pa garantiza e transparencia y eficacia di e Huurcommissie, asegurando cu e procesonan legal y regulacionnan relaciona cu huur ta ser maneha na un manera husto y efectivo.

SINTONISA

CONFERENCIA DI PRENSA  
DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM



# MINISTER GEOFFREY WEVER TA FELICITA GRUPO BENNU PA REAPERTURA DI MANGO NA CAYA BETICO CROES

Minister di Asuntonan Economico, Comunicacion y Desaroyo Sostenibel, Geoffrey Wever, a presencia e reapertura grandioso di Mango na Caya Betico Croes. E Minister ta extende su felicitacionnan mas cordial na Grupo Bennu y ta gradici nan sinceramente pa nan confiansa y contribucion importante na economia di Aruba y nan inversion den e area principal di Oranjestad.

Grupo Bennu ta doño di varios otro franchise cual nan shopnan ta ubica den caya grandi, y ta muestra di tin un conocimiento pa e mercado local y regional. A pesar di e retonan tog nan ta mira e oportunidad pa sigui inverti. E reapertura di Mango ta un demostracion di confiansa cu ta spera motiva otro empresarionan pa reconsidera e posibilidadnan den y rond di centro di Oranjestad, cual ta den liña cu esfuersonan di gobierno pa revitalisa e area.

Minister Wever ta expresa su gratitud pa e rol activo cu Grupo Bennu ta hunga den fomenta crecimiento y renovacion economico, y ta mira padilanti pa mas desaroyonan positivo den futuro cercano.







## BALUARTE DEN DEPORTE SR. EMILE HERDE A RICIBI RECONOCIMIENTO DURANTE PREMIO EXCELENCIA DEN DEPORTE



Dia 19 di april 2024, Premio Excelencia den Deporte 2023 a tuma luga den e ballroom di Renaissance Convention Center, unda a reconoce dies (10) baluarte cu a contribui gran parti di nan bida den e mundo deportivo.

Baluarte den Deporte Sr. Emile Herde a ricibi reconocimiento di Prome Minister Evelyn Wever-Croes. Sr. Emile a practica diferente deporte, pero a enfoca gran parti di su bida den e disciplina di basketball. Sr. Emile a cuminsa practica e deporte di basketball cu 13 aña di edad y a hunga te cu 40 aña. Desde

cu Sr. Emile tabatin 20 aña, el a cuminsa fungi como entrenado y te dia di awe ta eherciendo e trabou aki. Pues, Sr. Emile tin un total di 55 aña ta coach.

Gran parti di su bida, el a dedica na e deporte di basketball y ta yen'e cu orguyo, paso e por a contribui den e formacion di e hobennan den nos comunidad. Finalmente, Minister Endy Croes ta gradici Sr. Emile pa contribui den e desaroyo di nos hobennan atleta y ta felicit'e cu su reconocimiento di Baluarte den Deporte. ■■■



# MINISTER ENDY CROES TA FELICITA E DIESOCHO (18) CIUDADANONAN CU A RICIBI UN CONDECORACION REAL PA NAN TRABOU BOLUNTARIO

**Danki pa boso contribucion na desaroyo di Pais Aruba**



Riba diabierna 26 di april, na Cas Ceremonial a tuma luga e Ceremonia di Condecoracion Real 2024 unda cu Gobernador di Aruba, Su Excelencia Alfonso Boekhoudt a condecora diesocho ciudadano di Aruba pa nan esfuerso y dedicacion boluntario na Pais Aruba. Tur aña na ocasion di celebracion di Aña di Rey, Kabinet Gouverneur y Comision Condecoracion Real Aruba ta organisa e evento unda cu e ciudadanonan cu a destaca den comunidad ta bin na remarca pa ricibi un Condecoracion Real di Su Mahestad Rey Willem - Alexander.

E siguiente personanan a ricibi e Condecoracion Real, como gradecimento pa nan esfuerso pa yuda boluntariamente:

**‘Officier in de Orde van Oranje-Nassau’:**

Señora Nicole Lucia Maria Hoevertsz

**‘Ridder in de Orde van Oranje-Nassau’:**

Señor Hendrikus Antonio Eldemiro van Gaalen

Señor Ricardo Omar Gogorza

Señor Gerard Leendert van Vliet

Señora Annemarie Johanna van Vliet-Melchers

**‘Lid in de Orde van Oranje-Nassau’:**

Señor Ronald Paul van den Berg

Señor Hugh Drummond Connor

Señora Désirée Geneviève Croes

Señora Jeanette Violette Ivony Croes-Fingal

Señora Swinda Martha Claire Dumfries

Señora Martha Esmeralda Gomez-Winterdaal

Señora Mirtha Maria Cabrini de Haseth-Bislik

Señor Edgard Cristobal Kelkboom

Señora Wilma Valeria Kuiperi-Jansen

Señora Gertruida Margarita Lampe-Jansen

Señora Helena Carmen Maduro

Señor Robert Anthony Reeberg



Señor Dionisio Fecito Richardson

Minister Endy Croes ta felicita e ciudadanonan cu a ricibi nan Condecoracion Real y ta gradici nan pa e trabou incansabel cu nan ta deplega di curason pa nos comunidad. Danki pa boso trabou, tempo y amor di traha boluntariamente pa nos pais. Nos ta sumamente orguyoso di boso. Por ultimo, e mandatario di Enseñansa y Deporte ta gradici e Comision Condecoracion Real Aruba pa nan trabou. ■■■



# MINISTER ENDY CROES TA GRADICI E ENTRENADONAN PA NAN CONTRIBUCION VALIOSO DEN E DESAROYO DI DEPORTE DI ARUBA

Recientemente, den e ceremonia di gala di Premio Excelencia den Deporte a honra binti (20) entrenado pa nan contribucion valioso den e desaroyo di deporte di Aruba. Minister Endy Croes y Presidente di Parlamento mr. Edgard Vrolijk a otorga e plakkaat na e entrenadonan.

E siguiente entrenadonan a ricibi un reconocimiento special:

Aruba Little League	Sandy Roga
Aruba Aquatics Federation	Cora Mora Martinez
Aruba Aquatics Federation	Tyrine de Kort
Aruba Aquatics Federation	Ismael Santiesteban
Aruba Athletic Federation	Melvin Dabian
Aruba Badminton Bond	Bernard Ricardo den Dunnen
Aruba Bowling Association	Rita Lopez-Henriquez
Aruba Paralympic Committee	Luciano Mazzeo
Aruba Sailing Association	Sam Van Dormael
Aruba Sailing Association	Yuri Hummel
Aruba Special Olympics	Ruben Croes
Aruba Table Tennis Association	Bryan Lopes
Aruba Taekwondo Association	Yoshmar Weaver
Aruba Tang Soo Do Association	Aymon Kelly
Aruba Triathlon Association	Glennon Eights
Aruba Volleyball Association	Elmer Robles de Medina
Aruba Wieler Bond	Lucien Dirksz
Aruba Wieler Bond	Bryan Elisabeth
Arubaanse Voetball Bond	Joally Lake
Schaak Vereniging Aruba	Lazaro Bueno


Pa ultimo, Minister Endy Croes ta gradici e entrenadonan pa nan contribucion den e desaroyo di deporte di Pais Aruba.







Ministerio di Enseñansa y Deporte



# Feliz Dia di Obrero

Danki pa contribui grandemente  
na economia di nos pais.

1 di mei 2024

Minister di Enseñansa y Deporte  
**Endy Croes**





## REFLEXION RIBA DIA DI LABOR



Awe ta un día di celebracion y reflexion, un dia cu nos ta honra e base y esencia di un sociedad: e trabou. Awe mi kier gradici tur trahado di Aruba, na tur cu dia aden dia afo ta sali for di cas cu su miho actitud pa por aporta na e progreso di su hogar, na e desaroyo y prosperidad di nos isla.

Mi sa cu pa hopi ta un esfuerso grandi pa sali bay traha, mama nan cu mester laga nan yiu na centro di cuida, tata nan cu ta sacrifica nan tempo cu nan famia pa bay traha y trece sustento di hogar. Pero cu a pesar di esaki asina mes ta duna lo miho cu nan tin pa ta un empleado ehemplar y honesto y esaki nos ta reconoce y balora.

Nos ta consciente di tur e desafio y obtaculonnan cu hopi di nos trahadornan ta enfrenta. Ta pa e motibo aki cu nos ta comprometi na tuma e pasonan necesario pa aborda e preocupacionnan aki y garantisca cu cada un di nos hendenan por tin un trabou digno.

### Desempleo y Salario Minimo

Nos di ministerio di Labor por sigura cu nos ta trahando pa mehora e condicionnan pa nos comunidad y esaki ta refleha den e logronan cu nos tin te awo: Nos a baha e desempleo di casi 9% na 2017 pa 4.0 % pa 2023. Nos a aumenta salario minimo cu un 46% di 2006 te cu 2024. Esakinan ta resultado cu ta mustra nos compromiso cu nos pueblo.

### Enseñansa pa Empleo

Tambe ta hopi importante pa cada persona cu ta biba riba e baranca aki, esun cu a nace aki, esun

cu a bay studia afo y esun cu a bin pa busca un miho porvenir cu ta dispuesto pa aporta na e desaroyo di nos pais, pa por tin un trabou digno. Ta pa esaki cu nos ta creando pilitica y programanan pa fomenta e oportunidad di trabou pa un y tur. Nos a reactiva Enseñansa pa Empleo, unda nos ta ofreciendo diferente cursonan, di customer service, Management y hopi mas, pa tur cu ta interesa por adkeri e conocimiento necesario pa e demanda laboral cu diferente gremio tin.

### Compromiso

Nos compromiso no ta te keda akinan so. Nos ta reconoce cu ainda tin hopi pa haci y cu e caminda pa husticia laboral ta largo. Sin embargo, cu determinacion y union, nos por supera cualkier obstaculo cu presenta.

Aruba ta conociendo un crecimiento economico impresionante. Cu esaki ta presentando oportunidad laboral pa tur, pa nos yiunan di tera, pa nos studentenan cu a bay prepara nan mes afo, pa e hobennan cu ta aki pero tambe pa tur e persona cu a bin nos isla pa aporta na progreso y desaroyo di nos Pais.

Mi kier expresa mi mas profundo gratitud na tur trahado pa boso dedicacion. Boso ta e forza cu ta impulsa nos progreso y boso esfuerso ta balora. Awe, ban celebra hunto nos logronan renobando nos compromiso pa construi un miho futuro pa nos tur!

**Feliz dia di labor!**



*Feliz dia di Labor.*

Bo Labor ta di Balor. Bo exito y progreso laboral ta den bo man.

Nos t'ey pa defende bo derecho.

Awe mi ta renoba mi compromiso pa sigui construi un miho futuro pa nos tur!

Glenbert F. Croes



*Ami ta cu Bo*



# 2024

## AÑA DI STABILIDAD Y PROSPERIDAD



### Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

